



AN COIMISIÚN  
EORPACH

An Bhruiséil, 30.6.2022  
C(2022) 4324 final/2 -

ANNEX

## **IARSCRÍBHINN**

**a ghabhann leis an**

## **TEACHTAIREACHT ÓN gCOIMISIÚN**

**Inneachar dréacht-Rialacháin ón gCoimisiún a fhormheas lena leasaítear Rialachán (AE) Uimh. 461/2010 ón gCoimisiún an 27 Bealtaine 2010 maidir le hAirteagal 101(3) den Chonradh ar Fheidhmiú an Aontais Eorpaigh a chur i bhfeidhm maidir le haicmí comhaontuithe ingearacha agus cleachtas comhbheartaithe san earnáil mótarfheithiclí**

## **IARSCRÍBHINN**

**RIALACHÁN (AE) .../... ÓN gCOIMISIÚN an XXX lena leasaítear Rialachán (AE) Uimh. 461/2010 ón gCoimisiún an 27 Bealtaine 2010 maidir le cur i bhfeidhm Airteagal 101(3) den Chonradh ar Fheidhmiú an Aontais Eorpaigh maidir le haicmí comhaontuithe ingearacha agus cleachtas comhbheartaithe san earnáil mótarfheithiclí**

(Téacs atá ábhartha maidir le LEE)

## **DRÉACHT**

TÁ AN COIMISIÚN EORPACH,

Ag féachaint don Chonradh ar Fheidhmiú an Aontais Eorpaigh,

Ag féachaint do Rialachán Uimh. 19/65/CEE ón gComhairle an 2 Márta 1965 maidir le cur i bhfeidhm Airteagal 85(3) den Chonradh ar aicmí áirithe comhaontuithe agus cleachtas comhbheartaithe<sup>1</sup>, agus go háirithe Airteagal 1 de,

Tar éis dul i gcomhairle leis an gCoiste Comhairleach um Chleachtais Shriantacha agus Riochtaí Ceannasacha,

De bharr an mhéid seo a leanas:

- (1) Le Rialachán (AE) Uimh. 461/2010 ón gCoimisiún<sup>2</sup>, deonaítear blocdhíolúine d'aicmí comhaontuithe ingearacha agus do chleachtais chomhbheartaithe san earnáil mótarfheithiclí ón toirmeasc atá in Airteagal 101(1) den Chonradh, faoi réir coinníollacha áirithe. Tá feidhm ag an Rialachán sin go dtí an 31 Bealtaine 2023.
- (2) Bunaithe ar an meastóireacht a rinne an Coimisiún ar Rialachán (AE) Uimh. 461/2010, tar éis comhairliúcháin poiblí, bhailigh an Coimisiún faisnéis agus sonraí a léiríonn leibhéal leordhóthanach cinnteachta gur chuidigh Rialachán (AE) Uimh. 461/2010 go héifeachtach le gnólachtaí féinmheasúnú a dhéanamh ar a gcomhaontuithe ingearacha san earnáil mótarfheithiclí. Bhí sé éifeachtúil freisin, toisc dá mba rud é nárbh ann dó, bheadh na costais a bhaineann le measúnú a dhéanamh ar chomhlíonadh comhaontuithe ingearacha san earnáil mótarfheithiclí le hAirteagal 101 den Chonradh níos airde. Tá breisluach ag baint leis freisin, rud a éascaíonn d'údarais iomaíochta náisiúnta agus do chúirteanna náisiúnta na rialacha a chur i bhfeidhm go comhsheasmhach.
- (3) Maidir leis na coinníollacha ar ar a mbonn a cinneadh raon feidhme agus ábhar Rialachán (AE) Uimh. 461/2010, tá siad fós comhchosúil a ndóthain chun cur i bhfeidhm an Rialacháin sin a fhadú.
- (4) Ionas go mbeidh an Coimisiún in ann athruithe a d'fhéadfadh teacht ar dhálaí margaidh a chur san áireamh, ba cheart síneadh cúig bliana a chur le tréimhse chur i bhfeidhm Rialachán (AE) Uimh. 461/2010.
- (5) Dá bhrí sin, ba cheart Rialachán (AE) Uimh. 461/2010 a leasú dá réir sin,

<sup>1</sup> IO 36, 6.3.1965, lch. 533.

<sup>2</sup> Rialachán (AE) Uimh. 461/2010 ón gCoimisiún an 27 Bealtaine 2010 maidir le cur i bhfeidhm Airteagal 101(3) den Chonradh ar Fheidhmiú an Aontais Eorpaigh maidir le haicmí comhaontuithe ingearacha agus cleachtas comhbheartaithe san earnáil mótarfheithiclí (IO L 129, 28.5.2010, lch. 52).

## TAR ÉIS AN RIALACHÁN SEO A GHLACADH:

### *Airteagal 1*

Cuirtear an méid seo a leanas in ionad Airteagal 7 de Rialachán (AE) Uimh. 461/2010 ón gCoimisiún:

#### *‘Airteagal 7*

Déanfaidh an Coimisiún faireachán ar fheidhmiú an Rialacháin seo agus déanfaidh sé meastóireacht ar an Rialachán sula rachaidh sé in éag an 31 Bealtaine 2028.’.

### *Airteagal 2*

Cuirtear an méid seo a leanas in ionad an dara mír d’Airteagal 8 de Rialachán (AE) Uimh. 461/2010 ón gCoimisiún:

‘Rachaidh sé in éag an 31 Bealtaine 2028.’.

### *Airteagal 3*

Tiocfaidh an Rialachán seo i bhfeidhm an fichiú lá tar éis lá a fhoilsithe in *Iris Oifigiúil an Aontais Eorpaigh*.

Beidh an Rialachán seo ina cheangal go huile agus go hiomlán agus beidh sé infheidhme go díreach i ngach Ballstát.

Arna dhéanamh sa Bhruiséil,

*Thar ceann an Choimisiúin*

*An tUachtarán*

*Ursula von der Leyen*